

ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XLI Ihap 5
Marso 7, 2010
www.philippinerevolution.net

Editorial

Mga epekto han El Niño, ginpapagrabe han dunot nga sistema ngan mga palisiya

Katatapos la han magkasurunod nga kalamidad, dugang nga destroso ngan kakurian na liwat an gin-aantos han katawhan Pilipino, labina han masa nga parag-uma, resulta han mas temprano, grabe ngan maiha nga kathuraw nga durot han El Niño.

Nalalain nga kagrabihon an epekto hini ha katawhan tungod ha pag-eksister han dunot nga naghahadi nga sistema ngan mga kontra-katawhan nga palisiya nga naghatag-wada ha pandarabong han dagko nga langyaw nga kapitalista, komprador ngan burukrata. Mas grabe pa, diri la nagin pabaya ngan inutil an mga naghahadi atubangan han kalamidad, ginsisingabot pa nira ini yana para mapulsan nira ngan han ira mga kakonsabo.

Prinsipal nga ginhihibang yana han kathuraw an maabot 750,000 ektaryas nga umhanan, pisan ngan mga inataman nga hayop nga nakasarig ha padayon nga suplay han tubig. Kalakip dinhi an mga probinsya ha Northern Luzon nga nahibangan han grabe nga mga bagyo hini la nga urhi nga parte han 2009. Gin-eestimit nga P10-20 bilyones nga kantidad han mga tanom, pisan ngan inataman nga hayop an mahihibang ha mga tiarabot nga bulan.


An kagrabihon han epekto yana han kathuraw nagin resulta prinsipal han maiha na nga pagkaruba han mga natural nga rekurso han tubig. Nagmara o hinibabaw an kasaslugan, katunggan, sapa, atabay ngan iba pa

nga surok han tubig tungod ha hiluagan nga pagdambong ha kabubkiran ngan kagugub-an han dagko nga kompanya ha pagmimina ngan paglalaging. Ha sugad waray magamit nga reserba nga tubig an masa nga parag-uma para ha mga tanom, pisan ngan pagpainom ha inataman nga hayop.

Mas grabe pa, an tubig nga natirok ha mga *dam* nga nagagamit hadto ha irigasyon iginhihikaw yana han dagko nga kapitalista nga nagtatag-iyahini.

Nadiri ini hira nga magpagawas hin tubig tungod kay an limitado na nga suplay iginprayoridad nira ha produksyon han kuryente nga asya an prinsipal nira nga ginkakakitaan. Waray ini hira

panginlabot
ha remalaso
nga ig-
dudurot



Mga landaw hini nga isyu...

Industriya han biofuels, ginpapatrunan

PAYPAY 5

Premyo ha mga nagaresto ha Morong 43, ginkondenar

PAYPAY 7

2 aksyon militar ha Bulacan

PAYPAY 10

han kathuraw ha agrikultural nga katunaan.

An operasyon han *dam* prinsipal para makaghakin hin ganansya resulta han pagsapribado hini subay ha mga palisiya nga dikta han mga imperyalista ha balayan han liberalisasyon, denasyunalisasyon, pribatisasyon ngan deregulasyon. Pagkatapos magin balaud han papet nga rehimen Arroyo hadton 2001 an Electric Power Industry Reform Act (EPIRA), an operasyon han haros ngatanan nga dagko nga *dam* ha nasud naihatag na ha dagko nga langyawanon nga kompanya ngan mga kasosyo nira nga komprador.

Samtang ginwawadahan an mga langyawanon ngan dagko nga negosyante nga mandabong ngan magpakahitar ha ganansya, diru-deretso naman nga ginpasibayan han mga naghahadi ha nasud an interes han katawhan ngan ginpasagdan nga madunot an lokal nga ekonomiya. Nalandaw an diru-deretso nga pagka-atrasado han agrikultura ha nasud ha kahibangan nga igindurot han grabe nga kathuraw yana. Partikular nga landaw yana an sobra nga kakulangan ngan kaduntan han sistema han irigasyon. Waray pa ha katunga han

kahagnaan ha bug-os nga nasud an naabot han irigasyon. An mayoriya nga kablans nga parag-uma natapod la ha uran. Kadak-an pa han mga naeksister na nga pampubliko nga impra-istraktura para ha irigasyon diri naman mapulsan. Waray pa ha katunga hini an may-ada naawas nga tubig. An pundo para kunta ha pag-ayad hini iginbubursa han anomaloso nga dagko nga burukrata kapitalista.

Samtang maiha na nga gin-aan-tuman an pag-abot han El Niño, waray anuman nga ginhihimo nga pangandam hini an reaksyunaryo nga rehimen. Kulang ngan urhi na kaupay an mga pitad han naghahadi nga rehimen para ayudahan an masa nga parag-uma hini nga panahon han kathuraw. Diri hini gin-gagamit an poder para obligaron an mga opereytor han mga *dam* nga mag-alotaga ngan magpaawas hin tubig para ha irigasyon. Waray gamit ngan paglabog la hin kwarta an ginhimo hini nga *cloudseeding operation*. Nakokontento la ini ha mga palabas nga buladas sugad han pagdistribwer hin pipirahay nga *artesian* ngan tubo han tubig ngan pagpagawas hin pundo nga subsidyo kuno para ha gahi ngan abono. Ginagamit pa


ini para ha eleksyon han mga kandidato han naghahadi nga barkadahan.

Mas grabe pa ginsisingabot yana han gobyerno Arroyo an kalamidad han kathuraw para pabuyuhon an liberalisasyon han importasyon hin bugas, mais, ngan tubong ha inataman nga hayop. An importasyon nga inagi ha National Food Authority (NFA) maiha na nga ginkukuhaan hin dako nga kurakot. Pagagrabihon pa ini ha pag-abre hin importasyon ha mga papaboran nga dagko nga hamad nga negosyante. Ighahatag liwat ha ira an dugang nga kontrol ha presyo ngan suplay han bugas ngan iba pa nga mga produkto.

Dugang nga destroso naman an igdudurot hini ha masa nga parag-uma ngan katawhan Pilipino. Ha usa nga gapil, an plano nga pag-import hin tres milyones metriko tonelada nga bugas ginkakabarak-an nga mas nga magpapabagsak ha presyo han lokal nga humay nga magdudurot hin dugang nga pagkaalkansi han masa nga parag-uma. Ha luyo nga gapil, tungod kay hul-os na nga makokontrol han dagko nga komprador an suplay han bugas, aantuman nga sisingabuton nira an kada higayon para utro pahitas-on an presyo hini ha merkado.

Atubangan hini, kinahanglan kaupay yana an hiluagan nga paggios han katawhan Pilipino para hugot nga kondenaron an naghahadi nga reaksyunaryo nga estado ha kawaray hini pangandam, ha pagpasibaya, ha anomaliya ngan ha kahamad nga singabuton pa an kalamidad. Kinahanglan ig-insister han katawhan an naangay para ha ira ngan sukton an mga naghahadi ha baratunon nira ha grabe nga mga destroso nga nahiaaguman yana han katawhan nga nahiludlod ha grabe nga kakurian ngan kagutom.

Samtang, kinahanglan liwat pag-andaman an epektibo nga pagato ha posible nga paggamit han naghahadi nga rehimen hin *emer-*

 <p>Tuig XLI Ihap 5 Marso 7, 2010</p> <p>Igin-gagawas an <i>Ang Bayan</i> ha yinaknan nga Pilipino, Bisaya, Iloko, Hiligaynon, Waray ngan Ingles.</p> <p>Mahihimo ini nga i-download tikang ha Philippine Revolution Web Central nga makikita ha:</p> <p>www.philippinerevolution.net</p> <p>Nakarawat an <i>Ang Bayan</i> hin mga kontribusyon ha porma hin mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton pahayagan. Maaabot kami pinaagi han mga <i>email</i> ha: angbayan@yahoo.com</p>	<h2 style="text-decoration: underline;">Gin-uunod</h2> <p>Editoryal:</p> <p>Mga epekto han El Niño, ginpapagrabeha han dunot nga sistema ngan palisiya 1</p> <p>Mga kasumpay nga balita 3</p> <p><i>Biofuel</i>, ginpapatrunan han mga kapitalista 4</p> <p>An TVDAC 5</p> <p>Panhihibang han pasista nga estado</p> <p>Premyo ha mga nag-aresto ha Morong 43 6</p> <p>Kontra-mina nga aktibista, ginpatay 6</p> <p>Pan-gigipit ha mga parag-uma ha Negros 7</p> <p>Lider-istudyante, ginharas 7</p> <p>Masaker ha Luisita: Waray pa hustisya 8</p> <p>Maniobra han pamilya Ampatuan 9</p> <p>Magdinaugon nga opensiba han BHB</p> <p>Aksyon militar ha Bulacan 10</p> <p>Mga ambus han BHB 11</p> <p>Balita 11</p>
<p>Iginpublikar an <i>Ang Bayan</i> duha kabeses kada bulan han Komite Sentral han Partido Komunista han Pilipinas</p>	

gency rule” ngan dugang nga kabangisan atubangan han dugang nga paggrabe han sitwasyon ngan paggios han katawhan.

Kinahanglan hul-os nga ipasulong an rebolusyunaryo nga pakigbisog nga asya gud la an mapagdesisyon nga magtatapos ha kakurian han katawhan ilarum han naghahadi nga dunot nga rehimen ngan atrasado nga pankatilingban nga sistema.

Kinahanglan yana an dugang nga rayhak ha pagpasulong han reporma ha tuna, kooperatiba nga kagiusan, iba-iba nga porma han bubligay ngan iba pa nga paggios para ha direkta ngan mas maihaan nga kapulsanan han katawhan ha sakob ngan palibot han mga rebolusyunaryo nga lugar.

Kaparte han responsabilidad han Partido ngan Bagong Hukbong Bayan (BHB) ngan han mga demokratiko nga organo han poder han katawhan an pagpakita hin epektibo nga pamumuno ha masa ha pag-atubang ha kalamidad. Ha ira pamumuno, agap nga nagios yana an mga rebolusyunaryo nga pwersa ngan organisado nga katawhan, labina ha mga lugar nga apektado han grabe nga kathuraw, para ha iba-iba nga pamaagi maatubang an grabe nga mga epekto hini labina ha ira produksyon.

Ginpagios an masa ha mga rebolusyunaryo nga lugar, kabakyang an mga yunit han BHB para pagbububligan an pag-ayad han mga sistema han komunal nga patubig, kalakip na an pagtukod hin mga bag-o ngan pag-ayad han mga nahibang nga sistema han irigasyon. Kalakip liwat hini nga mga paningkamot an pagtukod hin gudti nga komunal nga *dam* ngan pagukad hin mga atabay. Gin-aadman liwat an paglisngi ha mga tanom nga kaya mabuhi bisan paman han kakulangan han tubig ngan kagrabihon han pasô, sugadman an iba pa nga mga alternatibo nga magpapakakitaan. AB

Pagpasibaya han estado ha mga parag-uma ngan parupangisda, ginkondenar

GINKONDENAR han mga parag-uma ngan mga parupangisda an pagpasibaya han gobyerno Arroyo atubangan han nagtitikagrabe nga epekto han maiha nga kathuraw durot han El Niño. Hini nga Marso 5, naglansar hin piket ha opisina han Department of Agriculture (DA) an 300 nga parag-uma, nga kadam-an tikang pa ha hirayo nga probinsya han Cagayan. Ginkondenar nira an maluya nga aksyon han ahensya ha gin-aatubang nira nga problema nga nakakahibang na han ira produksyon. Sering nira, waray pa hira nakakarawat nga ayuda tikang ha ₱1.7 bilyones nga pundo han DA para ha mga nadedestroso han El Niño.

Ini nga gios-protesta kaparte han usa kasemana nga serye han mga aksyon masa nga ginhihimo han mga progresibo nga organisasyon sugad han Kilusang Magbubukid ng Pilipinas (KMP), Pambansang Lakas ng Kilusang Mamamalakaya ng Pilipinas (PAMALAKAYA) ngan Bagong Alyansang Makabayan (BAYAN) para ig-insister ha gobyerno Arroyo nga igdistribwer na an nasinger nga pundo.

Hadton Marso 2, syahan nga naglansar hin piket ha DA an 200

nga parupangisda tikang ha mga komunidad han Laguna de Bay. Nagtambak hira hin mga *water lily* atubangan han bilding han DA ngan ginkondenar hi DA Secretary Arthur Yap ha diri pagpapagawas hin pundo nga nakaalotaga ha mga nahihibangan han El Niño. Sering nira, kinahanglan ipagawas na an pundo para maibanan an epekto han maiha nga kathuraw nga nagpapahibubo na ha lebel han tubig han 90,000 ektaryas nga Laguna de Bay. AB

Pundo para ha irigasyon, limas na

SAKOB hin noybe anyos ilarum han paghahadi nga Arroyo, waray pag-uswag ha irigasyon. Nahitabo ini ha luyo han pag-alotaga hini hin pinakadako nga parte (33%) han badyet han Department of Agriculture.

Ha imbestigasyon han Kilusang Magbubukid ng Pilipinas (KMP) ha ₱3.7 bilyones nga pundo nga igin-alotaga kuno ha pag-ayad han mga sistema nga irigasyon hadton 2007, iginreport han ngatanan nga tsapter hini ha ngatanan nga rehiyon ha nasud nga waray ginhihimo nga pag-ayad ha mga irigasyon o pagpundo hini han National Irrigation Administration. Nadiskubre liwat nga an haros bug-os nga pundo hini ginamit ha kampanya han mga kandidato ha eleksyon han barkadahan Arroyo hadton 2007. AB

Krisis ha enerhiya, ginsisingabot

TUNGOD ha grabe nga kakulangan hin suplay han tubig ha mga *dam*, pumapalyar an operasyon han mga *power generator* ngan nagkukulang an produksyon han kuryente labina ha Mindanao. Plano han rehimen US-Arroyo nga singabuton an sitwasyon para magdeklarar hin krisis ha enerhiya ngan magpatuman hin “*emergency powers*,” ha bendisyon han Electric Power Industry Reform Act (EPIRA).

Pareho han nahitabo hadton panahon han rehimen Ramos, seguridad nga dako na naman an igbubursa han mga anomaloso nga opisyal han rehimen ha pagtukod ngan pagplete hin mga kadugangan nga kapasidad para ha pagprodyus hin kuryente. Gintatantiya nga magastos an gobyerno hin tubtub ₱10 bilyones para hini. Mas pahuhugton hini an kontrol han mga pribado nga kompanya ha produksyon han kuryente ngan dugang ini nga magpapaumento ha kabaraydan han kuryente. AB


Nagpapatron an mga lokal ngan langyawanon nga kapitalista ha industriya han *biofuel*

Nagresulta ha hiluagan nga panlupot hin tuna ngan pandaram-bong ha rekurso han nasud an pag-apura han mga langyawanon ngan lokal nga kapitalista nga mamuruhunan ha produksyon han *biofuel* ha nasud. Tungod hini nagkukusog an pagtipa ngan pag-ato han iba-iba nga sektor han katawhan ha mga proyekto nga *biofuel* nga igin-duduso mismo han gobyerno Arroyo.

Sumala ha datos han Philippine Agricultural Development and Commercial Corp. (PADCC), hadton Setyembre 2009, may-ada na 40 nga langyawanon ngan lokal nga kompanya nga namuhunan hin ₱83 bilyones ha 49 nga proyekto nga *biofuel* ha nasud tikang pa hadton 2007. An ₱40.8 bilyones hini ginamit ha pag-abre hin mga plantasyon han *jathropa* (tuba-tuba), bi-langhoy, lubi, tubo, *hybrid* nga mais, humay ngan *sorghum* ngan an ₱42.5 bilyones ginamit ha pagtukod hin mga pabrika ha pagproseso.

An nasering nga mga langyawanon nga kompanya ngan mga lokal nga kasosyo nira nagkokontrol yana ha masobra kwatro milyones ektaryas nga katunaan ha iba-iba nga parte han nasud kun diin matatad-an an ira higluag nga plantasyon ngan mga distileriya. Pananglitan, an Pacific Bio-Field Corporation han Japan nagkokontrol han 600,000 ektaryas nga katunaan ha Ilocos Norte. Samtang, ha este nga parte han norte Luzon, an LA Investment Capital han US nagtukod hin masobra 100,000 ektaryas nga plantasyon han *jathropa* ha mga probinsya han Cagayan, Isabela, Nueva Vizcaya, Quirino, Nueva Ecija ngan Quezon. Ha iba-iba nga parte han Mindanao, an NRG Chemical Engineering, usa nga British nga kompanya nagkokontrol ha masobra usa kamilyon ektaryas nga

plantasyon han *jathropa* ngan an Abundant Resources Corporation, usa nga kompanya nga Amerikano nagkokontrol ha masobra 100,000 ektaryas nga plantasyon han *jathropa* ha Bukidnon. Ngada yana, nagpapadayon an rehimen Arroyo ha pagtudlok han mga lugar nga pagtutukuran hin usa kamilyon ektaryas nga plantasyon han *hybrid* nga humay, mais ngan *sorghum* para ha mga Tsino nga kompanya han *biofuel*. Nakaplastar ini ha mga probisyon han 11 nga kasarabutan nga ginpirmahan han rehimen Arroyo ngan China hadton 2007 ka-




balyo han gin-aaro hini nga pautang.

An mga imperyalista nga nasud sugad han US, Japan ngan mga membro han European Union an nagduduso han pagpahiluag han industriya han *biofuel* ha Pilipinas. Ginsakyan han dagko nga kapitalista an panawagan para ha alternatibo nga pansungo atubangan han prinsipal nira nga responsabilidad ha pankalibutan nga pagbabag-o han klima.

Subay naman ha dikta han imperyalista nga US, sunud-sunuran nga iginpatuman han rehimen Arroyo an Biofuel Act of 2007. Nakaplastar ha nasering nga balaud nga ngatanan nga gasolina nga igbabaligya ha sakob han nasud kinahanglan saladuhan hin 10% nga *ethanol* pagka-2010 ngan an mga sarakyan naman nga nagamit hin krudo kinahanglan na liwat gumamit hin *biodiesel*.

Pagtipa ngan pag-ato han katawhan. An Pambansang Lakas ng Kilusang Mamamalakaya ng Pilipinas (PAMALAKAYA) pormal nga nag-insister ha gobyerno han Japan hadton Hulyo 2009 nga igbasura an 600,000 ektaryas nga proyekto nga *biodiesel* han Pacific Bio-Diesel Corp. ha bungto han Pagudpud, Ilocos Norte ngan an Japan-Philippines Economic Partnership Agreement (JPEPA) nga asya an balayan hini nga proyekto. Nag-apelar liwat an Catholic Bishops' Conference of the Philippines (CBCP) ha gobyerno Arroyo nga ibasura an nasering nga proyekto tungod kay ginhihikawan hini hin tuna an gudti nga parupangisda ngan parag-uma nga waray o kulang hin tuna.

Subay ha napagkaurusahan, an kompanya nga *biodiesel* han Japan ngan an lokal nga kasosyo hini magdedeliber hin mga produkto nga *biodiesel* para ha konsumo han publiko nga Hapones ngan diri ha mga Pilipino. Sering ni Fernando



Hicap han PAMALAKAYA, imbes nga magpapatan an gobyerno Arroyo hin tinuod nga agraryo nga reporma para ha masa nga parag-uma nga Pilipino nga 70% in

kulang o waray tuna nga ginuuma, gintutugutan hini an Japan nga pletehan hin 25 anyos an higluag nga katunaan. May-ada liwat kalibrihan an Japan nga pahilawigon pa an kontrata hin 25 anyos.

Ginkondenar liwat ni Archbishop Angel Lagdameo, anay presidente han CBCP an proyekto tungod kay an 600,000 ektaryas nga katunaan para hini masobra na katunga han bug-os nga target han CARP (Comprehensive Agrarian Reform Program) han gobyerno.

Antes ini, hadton 2008 iginbuksas ngan hugot nga gin-atuhan han mga mulupyo han ikatulo nga distrito han Negros Oriental an Tamlang Valley Agricultural Development Corp. (TVADC) komo instrumento ha panlupot hin tuna han dagko nga komprador burgis ngan agaron maytuna ha probinsya. Ginpamunuan an protesta han District Farmers Alliance (DFA), usa nga alyansa han mga paraguma ha nasering nga distrito. (*Kिता an kasumpay nga artikulo.*)

Atubangan han hiluagan nga panlupot hin tuna nga nahitatabo gamit an mga proyekto nga *biofuel*, waray iba nga mahihimo an katawhan kundi an diru-deretso ngan hugot nga pagbuksas ngan pag-ato hini nga kontra-paraguma ngan kontra-katawhan nga balaud. AB

An Tamlang Valley Agricultural Development Corporation

An Tamlang Valley ha Negros Oriental usa ha mga natudlok nga lugar ha bug-os nga nasud kun diin una nga iginpatuman an proyekto nga *biofuel*. Nagtukod dinhi hin distileriya ngan plantasyon han *jathropa* ngan bilanghoy ngan ginpunduhan ini hin ₱2 bilyones. Luggop hini an 24,116 ektaryas nga katunaan ha iba-iba nga baryo ngan sityo han mga bungto han Siaton, Valencia, Sibulan ngan Sta. Catalina. Kasumpay hini nga proyekto may-ada liwat gintukod nga planta ha enerhiya ha San Carlos City, Negros Occidental nga gindudumara han San Carlos Bioenergy Corp. nga may-ada pundo nga ₱1.8 bilyones.

Para ipatuman an nasering nga proyekto gintukod an Tamlang Valley Agricultural Development Corp. (TVADC) ha pangunguna ni anay Kongresista Herminio Teves ngan kasosyo hini nga hi Julio Sy. An 65% pananag-iyang nira Teves ngan Sy samtang an 35% hini pananag-iyang han lokal nga gobyerno. Pinaagi han impluwensya niya ha politika, nagplete hi Teves ha DENR hin 24,116 ektaryas nga katunaan hadton 2006 ngan gin-aprubahan ini hin waray pag-agi ha pampubliko nga imbestigasyon.

An mga paraguma ginpapaentra ha duha nga kasarabutan—*contract farming* ngan *corporate farming*. Ha kasarabutan nga *contract farming*, ginpapautang hin ₱15,000 kada ektarya an mga paraguma para magkamay-ada kuno hira hin panggastos ha pagtanom. Kada pag-ani papaliton han TVADC an produkto nira ngan an bayad hini asya an pagtitikangan han pambayad han paraguma ha iya utang.

Ha *corporate farming* naman, an ngatanan nga gastos aakuon han TVADC ngan plepletehan hini an tuna ha tag-iyang han tuna o ha gobyerno hin ₱500 la kada ektarya kada tuig. Kun magtatrabaho an mga paraguma ha tuna susuhulan hira hin ₱160 kada adlaw.

Para maseguro an pagpapatuman han nasering nga proyekto ngan mapuypoy an pagtipa han mga residente, tikang pa hadton

Hulyo 26, 2007 gin-gagamit han kompanya an 61st IB Bravo Company han AFP, mga elemento han CAFGU ngan mga ahente paniktik para maglansar hin mga sustenido nga operasyon.

Ngada yana pwersado nga iginpatuman an nasering nga proyekto kabalyo han pag-antos han mga paraguma. Sobra nga kakurian ngan dislokasyon an gin-aantos han mga paraguma durot han butad ngan ligal nga panlupot hin tuna. Pananglitang, kun diri hira makabayad hin utang poyde na nga makumpiska an ira katunaan. Waray na liwat hira katungod nga kontrolon kun ano an igtatanom dinhi ngan ha kaurhian nagigin trabahador ha uma nala hira ha kalugaringon nira nga tuna. Dugang pa, samwak liwat an pagtalapas ha tawhanon nga katungod nga ginhihimo han mga pasista nga militar.

Tikang hadton ikaduha nga parte han 2008 nagtikang na nga magurusa an mga paraguma dinhi para atuhan an nasering nga proyekto. Naglansar liwat hira hin samwak nga kampanya nga edukasyon hiunong ha nasering nga isyu. Nagtukod an mga paraguma hin iba-iba nga organisasyon ngan naglansar hin duruyog nga paggios sugad han pakipagdayalogo, pulong-pulong, petisyon, rali ngan iba pa. Igin-iinsister nira an pagpapatuman han tinuod nga reporma ha tuna komo asya la nga solusyon ha problema ha tuna han mga paraguma. AB



Premyo ha mga nag-aresto ha Morong 43, ginkondenar


Sugad han ginlalauman, gindayaw ngan ginpremyuhan han Armed Forces of the Philippines (AFP) an mga opisyal hini nga iligal nga nan-aresto han 43 nga trabahador panlawas hadton Pebrero 6 ha Morong, Rizal samtang naghihimo hin treyning-medikal. Gin-akusaran an mga biktima nga mga membro kuno hira han Bagong Hukbong Bayan (BHB) ngan naghihimo kuno hin treyning ha paghimo hin bomba.

Hugot nga ginkondenar han Health Alliance for Democracy (HEAD), mga pamilya han ginsesering nga “Morong 43,” mga simpatisador nira ngan mga militante nga magbaralaud an paghatag han militar hin mga medalya nga Bronze Cross, ikaupat nga pinakahitaas nga premyo militar kanda Col. Aurelio Baladad ngan Lt. Col. Jaime Abawag hadton Pebrero 23 ha Camp Nakar, Lucena, Quezon.

Sering nira, an iligal nga pagreyd ngan pag-aresto ha 43 nga trabahador panlawas ngan an kasunod nga mga pagtorturyur ngan pagtalapas ha tawhanon nga katungod han mga biktima butad nga pagbalewaray ha tama nga proseso ngan kinahanglan kondenaron. Imbes nga hatagan hin premyo o mga medalya an mga opisyal han militar nga butad nga nagtalapas ha mga tawhanon nga katungod, angay hira kasuhan ngan prisuhon.

Maiha na nga palisiya han reaksyunaryo nga rehimen US-Arroyo an paghatag hin premyo ha mga butad nga nagtatalapas han tawhanon nga katungod. Mahinunumduman nga gindayaw ngan dayon gintagan hin promosyon ni Gloria Arroyo hi Gen. Jovito Palparan, Jr. hadton 2006. Tikang ha pagka-koronel, napromot hi Palparan komo *brigadier general* hadton 2003, ngan nagin *major general* hadton 2004. Bisan paman han iya rekord komo aktibo nga tagapagpatuman han mga ekstrahu-

disyal nga panmatay ha mga lugar kun diin hiya igin-aasayn, ginhimo hiya nga hepe han 8th ID ha Eastern Visayas ngan hepe han 7th ID ha Central Luzon. Ha iya 2006 State of the Nation Address waray awod nga gindayaw pa ni Arroyo an nasering nga berdugo.

Na-promot liwat komo koronel an mga nagsikmit ha aktibista nga hi Jonas Burgos nga hira Noel Clement, Melquiades Feliciano ngan Edison Cagal. An iba pa nga mga elemento han militar nga natagan hin premyo o medalya ngan iginpadara ha mga panmilitar nga eskoylahan ha langyaw nga labnasan tungod ha pagpatuman nira hin mga kamanduan nga butad nga nagtatalapas ha tawhanon nga katungod amo hira Gen. Delfin Bangit, pinuno han ISAFP han mahitabo an iskandalo nga “Hello Garci” ngan Col. Oscar Lactao, anay hepe han yunit nga nagmasaker ha siyam nga parag-uma ha Kananga, Leyte hadton Abril 2003. 



Aktibista nga kontra-mina, ginpatay ha Cagayan

Waray na umabot ha iya balay hi Gensun Agustin, 30 anyos, katapos hiya pagpupsilon tubtub mamatay hadton kulop han Marso 1 ha Barangay Calamegatan, Buguey, Cagayan. Membro hi Agustin han Alliance for Buguey Community Advocates (Albucada) ngan han Federation of Anti-Mining Advocates in Cagayan (Famac), mga organisasyon nga naato ha iligal nga pagmimina ha probinsya. Tipauli na kunta hi Agustin sakay han iya motorsiklo han pagpupsilon hiya han duha katawo nga sakay liwat han motorsiklo.

Kaaway nira Agustin an mga nagmimina hin *magnetite* ha probinsya. An *magnetite* ginkukuha tikang ha itom nga baras ha kababayunan han Cagayan. Ginkakabarak-an han mga aktibista nga makalibungan nga mabubutang ha peligro an probinsya ha padayon nga pagkuha hin *magnetite* tungod kay ini an elemento nga nagbubugkos ha mga baras. Posible nga magin hinungdan han mga pagbaha ha probinsya an pagkawara hini nga *magnetite*.

Samtang, ginkondenar han KARAPATAN-Negros ngan alyansa nga September 21 Movement an atentar nga pagpatay kan Ronaldo Capitanea, 23 anyos, *public information officer* han Camindangan Small Farmers Association (CASFA), nga membro han Kilusang Magbubukid ng Pilipinas (KMP). Gintudlok nga mga kriminal hini nga pinakaurhi

“Aktibista...,” *sundan ha paypay 7*

“Aktibista...,” tikang ha paypay 6

nga harasment an *death squad* han 61st IB han Philippine Army.

Ginpusil hi Capitanea han duha nga naka-bonet nga lalaki hadton Pebrero 22 ha Hacienda Mabuhay, Barangay Gil Montilla, Sipalay City, Negros Occidental. Sakay hiya hadto ha iya motorsiklo nga “habal-habal” para kuhaon an regular niya nga pasahero nga magturutdo han pagpupsilon hiya han duha nga

tawo nga nakasakay ha usa nga itom nga motorsiklo nga DT. Aada ha hospital yana ha Bacolod City an lider-parag-uma ngan nagrerekaber ha nahiaguman niya nga samad.

Sumala kan Fred Caña, kabugusan nga sekretaryo han KARAPATAN-Negros, an panmusil kan Capitanea kaparte han sistematiko nga kampanya han militar nga pamingawon an mga membro han mga progresibo nga organisasyon. **AB**

Pan-gigipit ha mga parag-uma ha Negros Occidental

Hugot nga ginkondenar han KARAPATAN-Negros an padayon nga harasment han mga *security guard* ngan pribado nga *goons* ha mga parag-uma nga membro han Pakigdaet sa Kalambuan sa Sitio Kambayugo, nga membro han National Federation of Sugar Workers (NFSW). May kalabutan ha tuna ini nga pan-gigipit han mga armado nga grupo han pamilya Lumayno ha Barangay Minautok, Calatrava, Negros Occidental.

Ginkastigo ngan ginpabuthan ni Raul Baterna an magbugto nga Cresensia Jumawan ngan Lucia Nativo hadton Pebrero 19 ha Sityo Minauyahan. Hi Baterna anay membro han Philippine Constabulary (an ginsaliwnan han Philippine National Police) ngan tawuhan han mga Lumayno.

Gintipahan nira Jumawan ngan Nativo an paghibang han traktora han mga Lumayno ha mga tanom nira nga duma. Resulta hini, ginsuntok ni Baterna hi Jumawan ha liog. Sumala ha mga nakatestigos han insidente, pira kabeses liwat nga nagpabuto han iya halipot nga pusil hi Baterna. Nag-atentar pagayuda hi Nativo ha iya bugto kundi ginkastigo liwat hiya han lima nga tawuhan han Jacua Security Agency ngan ni Baterna. Para waray makaduok nga taghimaryo, nagpabuto han ira mga pusil an mga

wardya han Jacua samtang padayon an paghibang han traktora ha mga tanom.



Sumala ha KARAPATAN-Negros, damo nga kaso han pagtalapas ha tawhanon nga katungod an pamilya Lumayno hadton nakalabay nga tuig. Usa hini an pagpatay ha parag-uma nga hi Reynaldo Bucaling ngan paglayo ha unom nga karabaw nga pananag-iyang mga residente ha lugar. Hadton Enero 15, 2010 nagpabuto han ira mga pusil hira Rodolfo Lumayno, barangay kapitan han Minautok kaupod an mga wardya han Jacua para tarhugon an mga parag-uma ngan pugngan hira nga maghulad ha tuna didto.

Nautro ini nga mga pangangabuso hadton Pebrero 6, 7 ngan 9. Labot kan Baterna ngan mga wardya han Jacua, kaupod ha mga nagharas an mga elemento han tulisan nga Revolutionary Proletarian Army (RPA). **AB**

Mga lider-estudyante, ginharas han militar

GINHARAS han militar hi Chaser Soriano, 4th year nga istudyante ha kolehiyo ha kurso nga *Psychology* ha Polytechnic University of the Philippines (PUP) ha Sta. Mesa, Manila. Kandidato liwat hiya ha pagka-presidente han Central Student Council ha PUP ilarum han Sandigan ng Mag-aaral para sa Sambayanan (SAMASA) ngan tsirman han Anakbayan-PUP.

Pira na kasemana nga ginsusubaybayan hi Soriano han diriyunipormado nga militar. Usa kaadlaw, han makita niya an nagsisinunod ha iya tigda ini nga nagsenyas nga baga nagtutok hin pusil kan Soriano. Hadton Pebrero 19, samtang tipauli hiya, dinuok ha iya an usa nga lalaki nga nakasakay ha motorsiklo. Han matunugan ini ni Soriano dayon hiya tumalikod ngan nagpadayon ha paglakat. Kundi naabutan hiya, gintutukan hin pusil ngan gin-agawan hin *cellphone*. Nanarhug an sundalo nga may-ada maraut nga mahitatabo ha iya kun diri hiya mahunong ha pagka-lider istudyante.

Antes ini, duha liwat nga membro han progresibo nga organisasyon ha PUP an gintiktikan ngan ginharas han militar. An syahan ginsundan pagsakay niya ha usa nga dyip ngan nababatian han mga pasahero nga gintarhug an aktibista han duha nga militar. Dayon naman dumalagan an aktibista para makalikay ha duha nga ahente. An ikaduha nga aktibista gin-akbayan ngan gintutukan hin pusil samtang nakada ini ha istambayan ha gawas han ira eskolahan. Gintarhug liwat hiya nga humunong na ha iya ginhihimo ha organisasyon. **AB**



Hustisya para ha mga biktima han Masaker ha Luisita

Makakab-ot han mga biktima han Masaker ha Luisita an hustisya, kundi diri ilarum han rehimen ni Benigno “Noynoy” Aquino III han Liberal Party. Ini an panan-aw han mga kapamilya ngan kaurupdan han 14 nga parag-uma nga namatay han pagpupsilon hira han mga elemento nga militar, pulis ngan pribado nga gwardya han asyenda ha butnga han ira welga hadton Nobyembre 16, 2004.

Pagtuis han mga datos, pagsabrag hin intriga. Yana pala nalalambungan na an ginhihingyap nira nga hustisya tungod kay gintutuis an mga datos hiunong ha masaker. Direkta nga ginsering ni Corazon “Dinky” Soliman, usa ha aktibo nga niyu-tiyo hadto ni Gloria Arroyo ngan yana usa ha mga tagkampanya ni Noynoy Aquino nga “duha la” kuno an namatay ha masaker ha Hacienda Luisita.

Karuyag liwat patutuuhon an publiko ni “Pinky” Aquino-Abellada, bugto ni Noynoy Aquino nga an mga maka-Wala ngan diri mga armado nga gwardya nira nga mga pulis ngan militar an may-ada binuhatan han “kasamukan” ha Hacienda Luisita. Nangintriga pa hiya han ginsering niya nga an duha ha mga biktima may-ada mga igo han bala ha taludtod. Karuyag sidngon, ginpusil kuno ini hira han ira mga kaurusa nga welgista.

Ini nga mga pahayag dako nga insulto ha mga pamilya ngan mga kasangkayan han mga biktima han masaker ngan ha mga parag-uma ha kabug-usan nga nakikigbisog para ha tinuod nga agraryo nga reporma. Kabaliskaran ini ha mga report han midya, ha mga ginsumpa-an nga pahayag han mga testigos ngan ha mga resulta han ginhihimo nga imbestigasyon katapos an masaker.

An mga pahayag nira Soliman ngan Abellada desperado nga pagtatabuh ha baratunon ngan pagkon-

sabuhay han pamilya Cojuangco-Aquino ngan han rehimen Arroyo para maniobrahon an pagpatuman han tinuod nga agraryo nga reporma ha 4,915.75 ektaryas han kabug-usan nga 6,443 ektaryas nga sakop han asyenda. Pag-atentar liwat ini nga pagawason nga an mga asendero kaupod han ira mga armado ngan podiruso nga mga kaurupdan ngan alyado ha gobyerno asya an naagrabyado han mga parag-uma ngan trabahador ha uma.

Antes pa man mahitabo an duguon nga komprontasyon ha Hacienda Luisita nahitabo na an masaker ha Mendiola hadton Enero 22, 1987 ilarum han rehimen ni Corazon Cojuangco-Aquino. Samtang nagmamartsa an masobra 5,000 nga parag-uma ngadto ha Malacañang para ig-insister ha rehimen Aquino an pagpapatuman han tinuod nga reporma ha tuna ginpauranan hira hin bala han mga armado nga ahente han



popostura nga liberal-demokratiko nga gobyerno. Pagkatapos han bubuhay, 13 nga parag-uma an namatay ngan masobra usa kagatos nga raliyista an nasamaran. Ngada yana waray pa nasisirutan resulta hini nga masaker.

Pagkatapos hin 17 anyos, utro umawas an dugo han pag-atentaran nga ipatuman han manedsment han Hacienda Luisita Inc. (HLI) an kamanduan han Department of Labor (DOLE) nga bumalik ha trabaho an mga welgista. Nakakuha an pamilya nga Cojuangco-Aquino hin Assumption of Jurisdiction ngan kamanduan nga bumalik ha trabaho tikang ha DOLE tungod kay may-ada direkta nga linya hadto an mga Aquino kan Arroyo. Waray igpatuman han mga welgista an kamanduan han DOLE. Bisan kun armado la han mga plakard, bato ngan labtik, gintindugan han mga welgista ngan mga tagsuporta nira tikang ha mga baryo nga sakop han asyenda an ira katungod. Gin-atuhan nira an duha nga tangke han militar, 17 nga trak nga puno hin mga sundalo, 700 nga pulis, usa nga *pay loader*, upat nga sarakyan han bombero ngan mga isnayper nga nakapwesto ha mga istratihiko nga lugar. Pagkatapos magpabuto hin 1,000 nga bala an gintimpo nga pwera han pulisya, militar ngan gwardya han HLI, namatay an 14 nga welgista ngan 121 nga iba pa an nasamaran.

Tungod ha grabe nga pagkon-donar tikang ha sakob ngan gawas han nasud, napiritan hi Arroyo nga tukuron an Task Force Luisita ilarum han Department of Agrarian Reform (DAR) para imbestigahan an mga isyu nga gintikangan han masaker. Han matantiya nga mapabor ha mga parag-uma ngan trabahador ha uma an desisyon han DAR,



nagsalawad hin petisyon ha Korte Suprema an pamilya nga Cojuangco-Aquino para pugngan an pagpagawas hini nga desisyon. Nag-isyu an Korte Suprema hin *temporary restraining order* (TRO) sanglit diri naipatuman an desisyon han DAR nga talapas ha Comprehensive Agrarian Reform Program an iginpapaeksister nga Stock Distribution Option (SDO) han HLI.

Ekstrahudisyal nga panmatay.

Binalik ha ira piketlayn an mga welgista pagkatapos mahilubong an mga biktima han masaker ha Hacienda Luisita. Kundi waray pag-iha gintikangan an pausa-usa nga panmatay ha mga nasuporta ha ira. Tikang Disyembre 8, 2004 ngada Oktubre 3, 2006, inabot ha walo an nahirekord nga ginpatay kasumpay han isyu ha Hacienda Luisita:

- ◆ Marcelino Beltran, usa nga retirado nga opisyal han Philippine Army nga nagin lider-parag-uma. Nakatalaan hiya nga mamulong ha Senado ngan Lower House hiunong ha nahitabo nga masaker han pagpupusilon hiya ha iya balay hadton Disyembre 8, 2004.

- ◆ Konsehal Abel Ladera han Tarlac City, nga namuno ha prosesyon han mga kaurupdan han mga biktima han masaker. Ginpurupsil hiya hadton Marso 5, 2005 samtang napalit hin mga kagamitan ha usa nga tindahan hin awto.

- ◆ Fr. Willian Tadena, usa nga padi han Iglesia Filipina Independiente (IFI).

Regular nga ginmomobilisa an iya parokya para buligan an mga welgista. Ginpusil hiya samtang nakasakay ha iya dyip ha haywey han La Paz, Tarlac hadton Marso 13, 2005.

- ◆ Ben "Tatang" Concepcion, usa nga 67 anyos nga lider han partido nga Anakpawis sa Pampanga ngan aktibo nga nasuporta ha mga welgista. Ginpusil hiya ha balay han iya anak ha Angeles City hadton Marso 17, 2005.

- ◆ Flor Collantes, kabug-usan nga sekretaryo han Bayan Muna-Tarlac. Ginpusil hiya ha iya karinderya hadton Oktubre 15, 2005.

- ◆ Ric Ramos, presidente han Central Azucarera de Tarlac (CATLU). Gin-isnayp hiya ha iya balay ha Mapalacsiao, Tarlac City hadton Oktubre

25, 2005. Kaupod han iya mga kasangkayan ginselebrar nira hadto an ginpagawas pala nga desisyon han DOLE nga nagmamando ha pamilya Cojuangco nga ihatag na ha mga trabahador an iginhihikaw nga suhol nira ha ngatanan nga adlaw nga nagwelga hira.

- ◆ Tirso Cruz, usa ha mga direktor han United Luisita Workers Union (ULWU). Unom kabeses hiya nga ginpurupsil tubtub mamatay samtang tipauli kaupod an iya tatay ngan duha nga bugto hadton Marso 17, 2006.

- ◆ Obispo Alberto Ramento, Supreme Bishop han IFI. Ginburunô hiya samtang nakaturug ha iya kwarto hadton Oktubre 3, 2006.

Labot hini nga walo nga ginpatay, ginpurupsil liwat an mga welgista nga hira George Loveland ngan Ernesto Ramos hadton Enero 12, 2005 ha weste nga geyt han Las Hacienda Subdivision (ha sakob han Hacienda Luisita). Naigo ha dughan ngan tiyan an duha pero nabuhi hira ngan igitudlok nga an mga kriminal nga nakasibilyan nga badigard han hadto Representante Noynoy Aquino. AB

Mga maniobra han pamilya Ampatuan

Nabuksas an maniobra han pamilya Ampatuan nga baydan an mga testigos ngan mga kapamilya han mga biktima han masaker ha Maguindanao o aregluhon an kaso ha gawas han korte. Sumala kan Atty. Nena Santos, abogado ni Esmael Mangudadatu, pira nga testigos para ha prosekusyon an ginbabaydan han mga niyu-tiyo han pamilya Ampatuan para mapaluya an kaso kontra ha 19 nga membro han pamilya Ampatuan nga ginsalawdan hin *multiple murder* tungod ha pagpatay ha 57 katawo, kaupod an 32 nga membro han midya.

Para magipit an mga testigos ngan madelatar an imbestigasyon han kaso, nagsalawad an mga abogado han pamilya Ampatuan hin iba-iba nga petisyon ha korte. Samtang ginhihimo ini nira, hinay-

hinay naman nira nga gindadaup an mga pamilya han mga biktima nga umabuyon ha pag-areglo.

Tungod ha iba-iba nga petisyon nga iginlalawad han mga abogado han mga Ampatuan, waray talaan

nga ginsuspinder an imbestigasyon han kaso tubtub diri pa nababaton ini ngatanan.

Samtang, hugot nga iginrekomendar han Initiatives for International Dialogues (IID), usa nga grupo nga nag-uundong han kamurayawan nga apurahon han gobyerno an pagpapatuman han balaud hiunong ha krimen kontra ha *sangkatauhan* sugad han henosidyo.

Ginsering han IID ha usa nga pahayag nga bisan kun napirmahan na ni Gloria Arroyo an Republic Act 9851 o Crimes Against International Humanitarian Law, Genocide and Other Crimes Against Humanity Act

masobra duha kabulan na an nakalabay, waray pa ini maipublikar ha duha nga mantalaan nga may-ada hiluag nga sirkulasyon o ha Official Gazette. Tungod hini, diri pa ini maipapatuman.

Iginpaplastar ha reaksyunaryo nga konstitusyon nga magkamay-ada la epektibidad an usa nga balaud katapos ini mahipublikar ha nasering nga mga publikasyon.

Sumala kan Gus Miclat, *executive director* han IID, an nasering nga balaud nagdedepensa ha katungod han mga tawo ha panahon han eleksyon kontra ha mga nagtatarhug ngan panhadlok han mga pribado nga hukbo ngan iba pa nga porma hin ekstorsyon o pan-gigipit, kabangisan o harasment.

Hadton 2001, inabot ha 80% han mga kaso han kabangisan nga may-ada kalabutan ha eleksyon binuhatan han mga pribado nga hukbo. May-ada 132 nga kaso an nahirekord hadton 2001. Hadton 2002, inabot ha 188 an nagin biktima han kabangisan ha eleksyon ngan hadton 2007, 158 naman an nagin biktima. Hadton 2009, pinakalandaw nga kaso han kabangisan nga may-ada kalabutan ha eleksyon an masaker ha Maguindanao nga binuhatan han pribado nga hukbo han pamilya Ampatuan.

Samtang, ginkondenar han mga pamilya han mga membro han midya nga biktima han masaker ha Maguindanao an ispesyal nga tratamyento nga iginhahatag han militar kan Andal S. Ampatuan, Sr. Naatubang ha kaso nga *multiple murder* an anay gobernador han Maguindanao.

Nakadetenir hiya ha usa nga hospital han militar tikang pa hadton Disyembre 6 bisan kun diri nanginginahanglan hin pagpapahospital an iya gin-iinabat kuno nga mga sakit. Igin-iinsister han mga kapamilya han mga biktima han masaker nga angay na liwat nga idetenir ha prisuhan an marumagurang nga Ampatuan. **AB**



2 nga aksyon militar, iginlansar han BHB ha Bulacan

Naglansar hin magkasunod nga mga aksyon militar an Bagong Hukbong Bayan (BHB) ha Bulacan hini nga syahan nga semana han Marso. Pagsirot ha usa nga lanong nga kriminal nga elemento ngan kontra-rebolusyunaryo an una nga aksyon nira ngan ginsundan ini hin dungan nga pag-atake ngan pagserra ha duha nga kompanya nga nakakahibang ha kalibungan.

Hadton Marso 2, gin-aresto ngan ginsirutan hi Genaro Aguirre, subay ha kamanduan han rebolusyunaryo nga husgado han katawhan. Dabi hi Aguirre ha serye hin pan-reyp, pagsikmit, panmatay ngan panlupot hin tuna ha mga parag-uma ha mga bungto han San Jose Del Monte ngan Norzagaray, puros aada ha Bulacan. Tagprotehir liwat hiya han kompanya nga WACUMAN Sanitary Landfill ha Sityo Takad, Barangay San Mateo, Norzagaray. An nasering nga kompanya nanhihibang han kalibungan pinaagi han iligal nga paglabog hin basura. Tagprotehir liwat hi Aguirre han kompanya nga nagtutunaw hin goma ha Barangay San Isidro, San Jose Del Monte. Usa liwat hiya nga impormer ngan *financier* han PNP ngan han 56th IB ha nasering nga probinsya.

Inato hi Aguirre han



atakihon han usa nga yunit han BHB an iya balay ngan nagresulta ini han iya pagkamatay. Nakumpiska ha iya an usa nga riple ngan mga pistola.

Hadto naman nga Marso 3 han aga, dudrungan nga ginreyd han usa nga platun han BHB an kompanya nga WACUMAN nga pananag-iya ni Domingo Miralles ngan usa nga tunawan hin goma ha Area 1 Karahome ha Norzagaray nga pananag-iya han usa nga negosyante nga Tsino. Ginpasad han ini han BHB.

Maiha na nga iginrereklamo han mga residente ini nga mga kompanya tungod ha pagkaruba han kalibungan ha ira lugar. Nagreklamo na hira ha Department of Environment and Natural Resources (DENR) ngan lokal nga gobyerno kundi waray ini hira ginhimo nga pitad ngan ginpro-

teksyunan pa an nasering nga mga kompanya. Sumala ha BHB-Bulacan, andam an iya yunit nga protektahan an katawhan ha probinsya kontra ha nanhihibang ha kalibungan.

Hugot hini nga iginpapatuman an mga palisiya ha pag-ataman han kalibungan ngan sisirutan an hin-uman nga matalapas hini. **AB**

Magdinaugon nga ambus han BHB

Onse nga sundalo han 23rd Division Reconnaissance Company (DRC) an namatay ngan pito pa an grabe nga nasamaran ha ambus nga iginlansar han Bagong Hukbong Bayan (BHB) hini nga Marso 6 ha Barangay Panaytayan, Mansalay, Oriental Mindoro. Nagpapatrolya an usa nga platun han mga sundalo nga pinamumunuan ni 2Lt. Ronnie Sipsip han ambuson hira han mga Pula nga mangaraway dapit alas-5:30 han aga. Ini an pinakadako nga ihap han mga kaswalti han militar hini nga tungod.

Agusan del Sur. Upat nga sundalo han gintimpo nga mga pwera han 26th IB, 23rd IB ngan 4th ID Civil Military Operations han Philippine Army an namatay kaupod an usa nga tinuyente han ambuson hira han mga Pula nga mangaraway han Larangang Gerilya 3-BHB ha Barangay La Fortuna, Veruela, Agusan del Sur hadton Pebrero 24 han gab-i. Tulo pa nga sundalo an nasamaran hini nga ambus.

Sakay han duha nga trak han militar an mga tropa tikang ha Barangay Bacay ngan tikadto ini hira ha Barangay Sta. Josefa han ambuson hira han mga gerilya han katawhan.

Compostela Valley. Usa naman nga tropa han 25th IB an namatay ngan duha pa an nasamaran han igkaengkwentro nira an mga Pula nga mangaraway han Larangang Gerilya 20-BHB ha Sityo Panon, Barangay Baylo, Monkayo, Compostela Valley hini nga Marso 5. AB

2 milyones nga balota ha ARMM, waray marka panseguridad

Nabuksas diri pala maiha nga waray marka panseguridad han National Printing Office (NPO) an gin-imprensa nga haros dos milyones nga balota para ha Autonomous Region in Muslim Mindanao (ARMM). An kawarayan han nasing nga mga marka, nga ginkakabarak-an nga tinuyo para magamit ha panlimbong ha tiarabot nga eleksyon ginkompirma mismo han usa nga taga-NPO.

An nasing nga anomaliya ginkompirma liwat han usa nga report han COMELEC nga nakarawat nira Archbishop Oscar Cruz ngan Fr. Jose Dizon han koalisyon nga Kontra-Daya.

Palisiya han NPO nga angay nakamarka han anuman nga opisyal nga dokumento nga gin-imprensa hini an mga marka panseguridad han ahensya para matuki kun tinuod o peke ini hira enkaso magkamay-ada mga pagkukwestyon. Sering han usa nga elemento han NPO, waray mabutangi hin kaangayan nga marka an mga balota para ha ARMM tungod ha pira nga nagin problema ha makina nga pan-imprensa. Waray pa liwat kuno mailanat an pagbutang hin marka tungod ha kakulangan hin panahon.

Sering ni Archbishop Cruz, waray gamit an nasing nga mga balota

tungod ha kawarayan hin ginkikinahanglan nga marka panseguridad. Magigin masayon para ha panlimbong ha eleksyon nga kopyahon an nasing nga mga balota agud maniobrahan an resulta han syahan nga *automated* nga eleksyon ha nasud. Nakakabaraka ini labina kay an mga probinsya ha ARMM kilalado nga balwarte han panlimbong ha bug-os nga kasaysayan han reaksyunaryo nga eleksyon ha nasud. Hiton liwat nga rehiyon ginhimo han administrasyon Arroyo an pinakadako nga panlimbong hadton eleksyon 2004 ngan 2007.

Nananawagan yana an Kontra-Daya nga sunugon an nasing nga mga balota atubangan han publiko para diri na magamit ha panlimbong. AB

Pagbastos ha sistema nga *party-list*, ginkondenar

GINKONDENAR han mga progresibo nga magbaralaud ngan organisasyon an pagbastos ha sistema nga *party-list* tungod ha plano nga pagpartisipar hini nira Rep. Mikey Arroyo han Pampanga ngan Dept. of Energy Sec. Angelo Reyes. Sumala kan Bayan Muna Rep. Teddy Casiño, kun hira hin-o nala an gintutugutan nga magin nominado han mga *party-list group* nga diri naman tinuod nga nagrerepresentar ha anuman nga agrabyado nga sektor o grupo.

Hi Reyes una nga nominado han 1-UTAK nga grupo nga *party-list* nga nagrerepresentar ha sektor han transportasyon samtang hi Arroyo naman nominado han grupo nga Ang Galing Party (AGP) nga nagrepresentar kuno ha mga drayber ngan *security guard*.

Ini nga mga organisasyon pira la ha gintukod nga mga peke nga grupo nga *party-list* han Malacañang para makipag-unahay ha pagkuha

han pwesto ha Kongreso ngan mapugngan an mga progresibo nga grupo ngan tinuod nga nagrerepresentar ha mga agrabyado nga sektor.

Ginsering ni Bayan Muna Rep. Satur Ocampo nga iginduduso nira an pagbag-o ha Party-list Law para pugngan an mga sugad hini nga grupo. Magsasalawad liwat hin kaso an Bayan Muna ha Commission on Election para madiskwalipikar hira Arroyo ngan Reyes. AB

Pakikisubo ha pagkamatay ni Jose "Apeng" Yap

NAGPAHAYAG hin pakisubo hi Prof. Jose Ma. Sison ngan an National Democratic Front of the Philippines (NDFP) ha pagkamatay ni Rep. Jose Yap, 81 anyos, nga iya gindayaw ha mahinungdanon nga mga nahiamot niya ha istorya pankamurayawan han reaksyunaryo nga gobyerno ngan rebolusyunaryo nga kagiusan.

Iginladawan ni Sison hi Yap komo sangkay ngan kaalyado nga "may-ada hitaas nga diwa han patriyotismo ngan konsensya nga pankatilingban." Ginkilala ni Sison ngan han NDFP an mga ispesyal nga nahimo ni Yap ha pagserbe ha katawhan komo meyor, magbaralaud, membro han kabinete, nasyunal nga ehekutibo ngan gobernador.

Gintudlok nira an mahinungdanon nga papel nga ginkatinan ni Yap para mabug-os an The Hague Joint Declaration hadton 1992 nga asya an nagin batakan nga balayan han istorya pankamurayawan. Ginsering liwat nira an nagin papel ni Yap para maungbawan an iba-iba nga nagin ulang ha negosasyon kun diin dako nga nakabulig an dako nga pagtapod ha iya han magkaluyo nga gapil.

Gindayaw han Negotiating Panel han NDFP an tinuod nga paningkamot ni Yap nga kab-uton ha istorya an murayaw nga solusyon ha armado nga banggaay ha Pilipinas. Sering hini, "Bisan kakan-o nga nakikipaghampang

hiya ha amon, maaram kami ngan abat namon nga tinuod hiya nga naniningkamot nga makab-ot an murayaw ngan makatadungan nga kasolbaran han banggaay ngan diri an pagluhod o pagsurender namon." Gintudlok liwat han NDFP an pagkapareho han pananaw hini ngan ni Yap nga kinahanglan solbaron an mga gamot han banggaay para makab-ot an makatadungan ngan panmaihaan nga kamurayawan ha nasud.

Nagpahayag naman hi Sison hin pagkasubo nga diri hul-os nga nasingabot han rehimen Estrada ngan Arroyo an serbisyo ni Yap ha pagpasulong han istorya pankamurayawan. "Kinahanglan pasidunggan ngan himuon nga susbaran han hin-uman nga masunod nga presidente han GRP an nahimo ni Rep. Jose V. Yap ha negosasyon pankamurayawan ngan ha pagtukod hin mga makatadungan ngan rasonable nga kasarabutan ha kapulsanan han katawhan," dugtong pa niya.

NDFP, nagpasidungog kan Josie Lichauco

NAGHATAG-PASIDUNGOG an National Democratic Front of the Philippines (NDFP) Peace Panel, kaupod an nga konsultant ngan istap hini ha pagkamatay ni Josefina "Josie" Lichauco hadton Pebrero 14 ha edad nga 75 anyos. Hi Lichauco anay membro han kabinete ilarum han rehimen Aquino ngan Ramos ngan aktibo ha kagiusan protesta. Sering ni Ka Luis G. Jalandoni, tsirman han NDFP Negotiating Panel, usa nga dako nga kawarayan an pagkamatay han usa nga tinuod nga sangkay han katawhan Pilipino, usa nga mabayanihon ngan pursigido nga mangaraway para ha hustisya, tawhanon nga katungod ngan epektibo nga pagdudumara.

Saludo an NDFP kan Lichauco komo waray kahadlok nga kritiko han korapsyon ha gobyerno. Usa hi Lichauco ha mga prinsipal nga nakondenar kan Gloria Arroyo. Madig-on liwat hiya nga nakontra ha ekstrahudisyal nga panmatay ngan iba pa nga pagtalapas han rehimen ha tawhanon nga katungod.

Mga dikta han IMF ha masunod nga presidente han nasud


WARAY paman himua an nasyunal nga eleksyon ha Mayo 2010 may-ada na igindidikta nga mga pampinansya nga palisiya an International Monetary Fund (IMF) para ha magigin bag-o nga presidente han nasud. Sumala ha pinakaurhi nga Country Report han IMF, kinahanglan padakuon han bag-o nga presidente han Pilipinas an kita han gobyerno hini, prinsipal na pinaagi han pag-imponer hin kadugangan nga mga buhis.


Kasumpay hini, magpapadara an IMF ha nasud hin "fiscal assistance team" para mag-andam hin istrat-hiya agud pakusgon an pagpapabutho hin mga bag-o nga buhis han masunod nga gobyerno nga mangangatungdanan ha Hulyo 2010. Ini an panaad nga ginpadig-on han IMF ngan ni Gloria Arroyo han mangutang hiya ha bangko hadton nakalabay nga tuig.

Ha yana, naabot na \$52 bilyones an utang han Pilipinas ha IMF-WB. An prinsipal nga utang ngan an interes hini an nakaon han haros 70% han kita han gobyerno.

Katapos ipagawas han IMF an Country Report hini, nagpahayag hini nga Marso 1 hi Benigno "Noynoy" Aquino III, kandidato han Liberal Party ha pagka-presidente nga posible nga mag-imponer hiya hin bag-o

nga mga buhis kun hiya an magigin presidente han nasud. Tigda ini nga pagbaliskad ha iginsaad niya hadton Enero atubangan han mga negosyante ha Makati nga diri hiya mag-imponer hin bag-o nga mga buhis. Hiya la ha mga kandidato ha pagka-presidente an nagpostura hadto nga makontra ha mga dikta han mga imperyalista nga bangko.

Igin-iinsister han IMF ha masunod nga administrasyon nga kombin-sihon hini an Kongreso nga mag-imponer hin mas hitaas nga buhis. Kalakip ha mga iginduduso han IMF an pag-umento han buhis ha tabako, bino ngan iba pa nga irimnon. 



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyon nga Waray
Tuig XLI Ihap 5
Marso 7, 2010
www.philippinerevolution.net

Editorial

Mga epekto han El Niño, ginpapagrabe han dunot nga sistema ngan mga palisiya

Katapos la han magkasurunod nga kalamidad, dugang nga destroso ngan kakurian na liwat an gin-aantos han katawhan Pilipino, labina han masa nga parag-uma, resulta han mas temprano, grabe ngan maiha nga kathuraw nga durot han El Niño.


Nalalain nga kagrabihon an epekto hini ha katawhan tungod ha pag-eksister han dunot nga naghahadi nga sistema ngan mga kontra-katawhan nga palisiya nga naghatag-wada ha pandarabong han dagko nga langyaw nga kapitalista, komprador ngan burukrata. Mas grabe pa, diri la nagin pabaya ngan inutil an mga naghahadi atubangan han kalamidad, ginsisingabot pa nira ini yana para mapulsan nira ngan han ira mga kakonsabo.

Prinsipal nga ginhihibang yana han kathuraw an maabot 750,000 ektaryas nga umhanan, pisan ngan mga inataman nga hayop nga nakasarig ha padayon nga suplay han tubig. Kalakip dinhi an mga probinsya ha Northern Luzon nga nahibangan han grabe nga mga bagyo hini la nga urhi nga parte han 2009. Gin-eestimit nga P10-20 bilyones nga kantidad han mga tanom, pisan ngan inataman nga hayop an mahihibang ha mga tiarabot nga bulan.

An kagrabihon han epekto yana han kathuraw nagin resulta prinsipal han maiha na nga pagkaruba han mga natural nga rekurso han tubig. Nagmara o hinibabaw an kasaslugan, katunggan, sapa, atabay ngan iba pa

nga surok han tubig tungod ha hiluagan nga pagdambong ha kabubkiran ngan kagugub-an han dagko nga kompanya ha pagmimina ngan paglalaging. Ha sugad waray magamit nga reserba nga tubig an masa nga parag-uma para ha mga tanom, pisan ngan pagpainom ha inataman nga hayop.

Mas grabe pa, an tubig nga natirok ha mga *dam* nga nagagamit hadto ha irigasyon iginhihikaw yana han dagko nga kapitalista nga nagtatag-iya hini. Nadiri ini hira nga magpagawas hin tubig tungod kay an limitado na nga suplay iginprayoridad nira ha produksyon han kuryente nga asya an prinsipal nira nga ginkakakitaan. Waray ini hi-



Mga landaw hini nga isyu...

Industriya han biofuels, ginpapatrunan

PAYPAY 5

Premyo ha mga nagaresto ha Morong 43, ginkondenar

PAYPAY 7

2 aksyon militar ha Bulacan

PAYPAY 10

Mga instruksyon ha pag-iimprenta

1. An **ginsundan nga paypay**, nga eksakto nga kopya han paypay 1 gawas ha mas pus-aw an *masthead* o *logo* in para ha mga nagamit hin *mimeo machine* o nag-iimprenta ha pamaagi nga *v-type*. Gindesenyo ini para diri madali nga mahibang an istensil.

2. Pag-*print* ha istensil:

- a) Ha *print dialog*, i-check an **Print as image**
- b) Tanggalon an *check* ha **Shrink oversized pages to paper size**
- k) I-click an **Properties**
- d) I-click an **Advanced**
- e) Seguruhon nga naka-set ha **100%** an **Scaling**
- d) Ipadayon an pag-*print*

3. Gin-aaghat an mga kasama nga ipaabot ha patnugutan han *AB* an anuman nga problema kasumpay han pag-iimprenta pinaagi han *v-type*. Magpadara hin *email* ha *angbayan@yahoo.com*